

楹

聯

續

話

臨聯叢話之輯始於桂林節署閱二年而稿成時遠近知
好以佳聯錄示者猶紛至沓來因前書已剞劂過半無由
僦入姑存篋衍而已辛丑仲春防堵梧江未遑從事鉛槧
夏初奉量移蘇撫之

命由湘江放荆江順流以達吳中甫受事卽提兵海上勞
勞軍事者四閱月旋以病作乞假解組養病邦上者又四
閱月復緣海氛孔棘倉猝南奔從干戈擾攘中飛渡錢江
甫得卸裝南浦合計兩年來往返奔波不下八千里流連
勝地邂逅名流所見所聞輒有埤益因復條舉而件繫之

仍依前編分門之例編成四卷題爲楹聯續話遂付梓人
憶在桂林時每得一聯輒與陳蓮史余小霞陳海霞桂舫
諸君子賞析之付梓時又得小霞專任校字之役故成書
不覺其難撫今思昔時異境遷老病日增徒形兀兀蓋不
禁感慨係之也道光癸卯夏至節福州梁章鉅撰於浦城
池上草堂

楹聯續話卷之一

福州梁章鉅輯

故事

余輯楹聯叢話前編應制門所錄野獲編中袁文榮撰嘉靖齋醮對聯洛水元龜云云實當攷入故事門今考鈕玉樵^秀觚賸亦載此事云崑崙山人初入都客淮南李公春芳所時世宗齋居西宮建設醮壇敕大臣製青詞一聯懸於壇門春芳使山人爲之山人走筆題曰洛水靈龜初獻瑞陽數九陰數九九九八十一數數通乎道道合元始天

尊一誠有感岐山威鳳兩呈祥雄聲六雌聲六六六三十
六聲聲聞於天天生嘉靖皇帝萬壽無疆李以進呈深加
獎賞由是公卿互相延譽其本傳謂大臣應制青詞多假
手山人者以此乃他人移之別氏則以雕蟲爲山人諱也
按此與野獲編所載互異前編所錄元龜丹鳳此作靈龜
威鳳尙可兩存而前編作雄鳴雌鳴則係傳寫之誤自應
從此作雄聲雌聲以與三十六聲相應也

周櫟園書影云坡公嘗言奉使西邸時見書此數句愛而
錄之云人間有漏仙兀兀三杯醉世上無眼禪昏昏一枕

睡雖然沒交涉其奈畧相似相似尙如此何況眞個是汴
人劉酒者無名字人卽以酒呼之已亦以自名能畫人物
賣畫得錢則與酒家余見之七年無夕不醉醉中作畫酒
氣拂拂從十指閒出嘗乞余顏其草堂余取坡公語題曰
畧似菴以人閒有漏仙三杯兀兀世上無眼禪一枕昏昏
爲楹聯酒得之殊自喜

施愚山獲齋詩話云龍濟寺在吉水城東南踞東山勝處
蘇長公初到嶺外曾過此寺題聯云天上樓臺山上寺雲
邊鐘鼓月邊僧手書刻於柱明末猶存或曰此坡老詩中

楹聯續話

卷之一

一聯也惜未見其全篇

先資政公曰凡著述一書無論大部小種皆須有益於世
有益於人使讀者有所感發而興起乃爲可貴記得先四
代祖司訓公諱珏雪園雜紀中有一條真齊家寶訓也其
言云前明南京禮部尙書餘姚孫忠烈公鑑殉宸濠之難
其子文恪公陞續娶楊夫人花燭日前妻三子鑑鍾鑑匪不
出拜文恪甚怒曰我家一門忠孝今無禮若此非吾子也
使家人覘之則皆在書塾中相持而哭楊夫人親往塾中
見諸子喜曰他日皆大器也文恪怒爲之解文恪訓子嚴

尋常不得出書塾每晨至門首加鑰而去一日楊夫人偶至其處自窗隙潛窺三子皆不在其中而門扃如故乃開門入視最後見壁上懸一畫畫後一門通焉察之則並未外出乃各與其妻聚談耳楊夫人亦不語惟手書一聯懸於壁云愛惜精神留此身擔當宇宙蹉跎歲月將何日報答君親諸子見之皆發憤後皆顯達其季子鑰楊夫人所出世所稱月峯先生者官尙書亦母教也

周櫟園問小紀云侯官林太守春澤正德甲戌進士爲戶部主事疏諫南巡遷員外郎以司藏失盜鐫秩復歷南京

刑部郎中出知松番府免歸公生於成化庚子至萬曆己卯年百歲有司建人瑞坊子應亮以戶部侍郎侍養亦年七十次起拜嬰鑠如壯年應亮子如楚工部侍郎公嘗率少司農少司空田中觀耘鄉人立碑紀之一時以爲盛事其大門有自撰樞聯云四十登科甲戌還登甲戌榜五旬生子長孫又抱長孫兒至癸未十月卒年百有四歲其百歲時猶生一女適雲南督學鄧原岳三代進士五代同堂一時有東西林之稱東林居林浦卽三代五尙書之家西林居南嶼卽人瑞翁宅也

雪園雜紀云林浦林家有七科八進士三代五尙書之稱

林文安公

滿

爲第一代尙書子二康懿公

延開

文德公

廷

機文德子文恪公

煥

及其弟煙亦俱接武爲尙書祠堂中

有一聯云國師三祭酒宮保五尙書

羅景綸

大經

鶴林玉露云杜成已爲相以日見賓客疲神

妨務無益於事乃不復見客但設青櫃於門有欲言利害者投之越旬日並櫃撤去有題一聯於府門者曰杜光範之門人將望而去矣撤暗投之櫃我且卷而懷之夫題門者薄矣而成已此舉亦未之思也

陳白沙先生行狀載有李某裹糧自嘉魚數千里從學白
沙凡二年先生服食行纏待之如子弟後築楚雲臺以居
之臺初一聯云有月嚴光瀨無金郭隗臺其欲來天下之
善蓋如此

施愚山矩齋雜記云董思白陳眉公以詞翰相推重董年
八十五臨終索婦人紅衫絳縐爲服陳年八十三將逝之
前辟穀數日盛爲詩歌以書別親友仍自題一聯云啓予
足啓予手八十年臨深履薄不怨天不尤人三千界魚躍
鳶飛擲筆而逝亦可謂了然於去來者矣

又家風輯畧云天啓丁卯聞余季父祇園公受知於督學使者賈侍御補邑諸生先考述明公贈之楹聯云端鼎上離長願景行正考父任天下事可能遙揖范希文其相勗之意深矣

陳眉公

繼儒

見聞錄云翟公樂嘗自製對聯云靜亦靜動

亦靜五臟剋消夫慾火榮亦忍辱亦忍平生不履於危機常熱嚴公訥輔政時封公尙在其門聯云堂上雙親壽朝中一品家申公時行解相印歸其堂聯云無毀無譽三代直道而行知止知足四時成功者退陸文裕公在京邸中

則榜世廟御撰一聯云抑人是自抑揚人其自揚都城鄭
宮保敬庵諱紳者以工部尙書告老其堂聯云世多君子
扶皇極天放閒人養太和翟中丞諱鵬者其堂聯云徒有
寸丹懸帝闕竟無尺素達權門王中丞璣更號六陽山人
嘗榜其堂曰偶爾謝上天富貴歸來作平地神仙又有天
上有人扶日月山中安我老漁樵吾鄉包公節與弟孝以
兄弟進士爲南北兩臺其門聯云兄進士弟進士一天雨
露南御史北御史兩地風霜湯東谷廳事春聯云東坡居
士林題杖南郭先生且濫竽後廳曰片言曾折獄一飯不

忘君蓋東谷嘗從興濟伯楊忠定公奉迎繼興故云其東
偏曰暫挂西山芴開開北濟尊其西偏曰長身唯食粟老
眼漸生花豪俠之氣可以想見

前輯楹聯叢話中已採入周

師

金陵瑣事茲覆闕之尙有

三條可補入者如云太祖賜駙馬柳股府門春聯云人間
塵俗不到處闕下恩榮第一家 又云成祖殺方孝孺於
聚寶門外有門人廖鏞廖銘檢其骨葬之不封不樹莫可
認識今諸搢紳立方祠於永寧寺後山又聚土爲墳上海
徐鯨刻一聯於華表云十族遺骸埋聚寶千年孤塚表長

千 又云有士人因病出神入閣羅殿記得殿中楹柱一
聯云是是非非地明明白白天

興化府志云正統間東鄉王常字大經以御史言事左遷
知莆田縣事政務嚴明嘗書聯署楹云牧民猶帶舊風霜
見者咸以爲佳其妻黎氏通書史語常曰風霜御史職也
君今出牧奈何專尙嚴乎請易猶帶二字曰無事何如常
欣然遂改之

甯德縣志云主簿丁大全因旱令人以銀瓶乞水於百丈
龍潭取之得瓦瓶歸大全疑之復造銀瓶躬往投之又得

其瓶大全祝曰龍神有靈若吾後當顯貴幸示靈異潭中
果露龍爪大全後登宰府奏封龍王架石爲亭題聯云龍
從百丈潭中起雨向九重天上來今亭址猶存

相傳明末倪鴻寶詣呂晚村呂揭一聯於堂楣云囊無半
卷書惟有虞廷十六字目空天下士只讓尼山一箇人後
呂詣倪倪亦揭一聯於堂云孝若曾子參纔足當一字可
才如周公旦容不得半點驕兩人之優劣見矣

孫柳君孝廉

衍慶

辛廬隨筆云前明嘉靖閒湖州潘時夏

司空

李別

最敬關帝督南河時有二蛟爲患公夢帝許助

以神力遂斬之今蛟首一在高家堰關帝廟中一藏公家
每歲於昆山麓祀帝時必陳之當昆山廟落成日衆擬撰
楹聯未就忽一素不識字之田夫入座提筆大書漢壽亭
侯廟五字扁又署楹聯云悠悠乾坤共老昭昭日月爭光
十二字不署款而去人或追問之則自云不知所爲也書
體絕似虞永興今猶存廟中云

上漁洋隴蜀餘聞云劉以平字近塘猗氏人爲諸生時夢
入宮殿中有王者命坐對奕又至一所石門懸聯句云鶚
鵠能回千載夢麒麟空臥萬年秋不解所謂旣登進士爲

潞王府官王敬禮如賓師遷陝西行太僕卿過武后墓墓上石刻一聯卽夢中所見也

又香祖筆記云廣州城南長壽庵有大池水通珠江溯洑日至池南有高閣甚麗可以望海其下曰離六宮主僧某乞余製爲楹聯余題句云紅橋映海三更月石湧通江兩度潮紀實景也

又云康熙時

上駐蹕杭州時山陰耆民王錫元同胞兄弟五人見於一行宮長次係雙生皆年八十歲三者七十八歲四者七十

六歲五者七十五歲率子姪凡十七人孫十八人賜宴
賜緞又賜扁額云一門人瑞皇太子賜聯云五枝錦
樹榮今代百秩仙籙萃一門

鈕玉樵曰茗中吳磐家饒於貲工書博學甲申後絕意進
取學使者張安茂題其居爲才人節士之廬然負氣甚高
未能韜晦順治中官方山備兵吳興與之交善因重修逸
老堂乞其長句一聯鐫懸堂柱吳走筆書云山川無恙歎
前輩風流何處但古道斜陽冷煙衰碣儘悲涼人物止剩
寒鴉臺閣重新問蒼穹英雄誰是有補天巨手回日珥戈

待整頓乾坤再來杯酒詞旣悲壯書復蔚跂有怨家潛錄
其語以吳陰蓄異謀首之帥府禍幾不測方山知之乘夜
撤去力爲回斡費千餘金事乃已

秋燈叢話云夏太史力恕孝感人康熙庚子夢謁關帝廟
帝諭之曰廟聯多不愜余意如三分忠義等字適足增余
痛好另爲作對將元爾矣授以巨筆夏書云英雄幾見稱
夫子豪傑如斯乃聖人帝稱善醒而識之遂謹鐫板而懸
於廟是科鄉試果第一 按英雄十四字熟在人口而不
知其出於夏也

楹聯續話

卷之一

九

茶餘客話云孫藩使含中太翁爾周宰浙時獨行杭州城外蔬村中一望土家纍纍見粉牆卽往索茶一小婢舉竹椅出令坐捧苦茶一盞飲之須臾去呼之不出見門上一聯云兩口居山水之間妻忒聰明夫忒怪四面皆陰燐所聚人何寥落鬼何多嚴問樵曰此歸元恭所自署聯云兩口寄安樂之高妻太聰明夫太怪四隣接幽冥之地人何寥落鬼何多

鈕玉樵曰故友王師石簪言嘉靖丁清惠公爲南畿操江時巡視郭外偶過刻字店顧指左右呼其人來而肩輿已

行閱三縣中年押一人投之階下曰刻字店主到公已忘
之熟視良久曰汝店所刻扁字筆畫有訛呼汝合收耳無
他也其人自公呼隨被銀鐐鎖至軍府這三日後還家中
人之產已費其半矣是知慎爾出話爲民上者尤所宜慎
子他日學成而仕尙其念之故余宰白水題一聯於後堂
云丹毫一點乃吾民利害攸關須念悖出必將悖入白曰
三竿卽爾室公私畢照莫謂知顯不在知微念故友之箴
言也

紀文達師閱微草堂筆記云明永樂二年遷江南大姓實

楹聯續誌卷之二

畿輔始祖椒坡公自上元徙獻縣之景城子孫繁衍析居
崔莊在景城東三里今土人以仕宦科第多在崔莊紀不
過舉其盛耳而余族則自稱景城紀不忘本也椒坡公故
宅在景城崔莊開兵燹火圯其址屬族叔榮庵家榮庵從
余受經以乾隆丙子舉鄉試擬築室移居於是先姚安公
爲預題一聯云當年始祖初遷地此日雲孫再造家後室
不果築而姚安公以甲申八月棄諸孤卜地惟是處吉因
割他田易諸榮庵而葬焉前聯如公自識也 又云劉念
臺先生官總憲時題御史臺一聯云無欲常教心似水有

言自覺氣如霜

蔡佛田

鴻遠

紫荊樹館雜著云康熙間蔡屏山

王楨

由內

閣中書改四川仁壽縣令當謁選之初夢至一所左右皆
遭火燬復歷荒草頽垣中則關聖帝像在焉肅拜畢仰觀
櫺閣有聯云打開義利關具見英雄過人氣概參透天人
路便是聖賢行已工夫此壬辰春事迨乙未莅縣事一一
如所歷適士民修廟工竣因書前聯以獻云

袁簡齋曰吳江徐布衣

靈胎

有權奇側儻之名余嘗訪之

於吳下年近八旬語猶風生泉湧所居隣太湖七十二峯

招之可到署其門云一生那有真閑日百歲仍多未了緣
又預營生壙自題其墓門云滿山靈草仙人藥一徑松風
處士墳

祖舫齋師曰前明葛屺瞻

寅亮

督學吾閩士林頌之官至

少司農甲申後樂浦城山水之美避居於此四方耆宿日
來造訪自署其門云豈有文章驚海內漫勞車馬駐江干
州府屢勸之入都遂閉門不出

李劍溪太僕

光雲

曰吾鄉京宦前輩有延師課子者於本

宅近處另闢精室一區聽館師出入自便乃其師好嬉游

無日不到城外戲園中聽劇同鄉知好有訪之者十有八九不得晤因新歲換寫桃符何愈修少皐逢傳適知其事因戲書一聯懸於門云園曰涉而成趣門雖設而常關次日館師見之卽褫被而去

庶制

繆蓮仙上塗說云乾隆四十五年

七旬萬壽時

聖製有七旬天子古六帝五代孫曾予一人之聯其時臣
工之撰燈聯者皆敬本此意以爲闡釋誠千載一時也謹
按漢世宗孝武皇帝在位五十四年壽七十一歲梁高祖
武皇帝在位四十八年壽八十六歲唐高宗神堯皇帝在
位九年壽七十一歲唐元宗明皇帝在位三十二年壽八
十歲六帝皆年踰七十若五世同堂則曠古帝王所未有

矣豈不盛哉

朱緘三孝廉

秉銘

曰聞乾隆

五旬萬壽時京師經壇有聯云四萬里皇圖伊古以來從
無一朝一統四萬里五十年聖壽自茲以往尙有九千九
百五十年氣象高濶設想奇創對仗亦新而穩與尋常楹
聯蹊徑迥乎不同相傳爲紀文達公所撰否則必屬彭文
勤公他人無此手筆也

黃霽青太守

安瀛

曰乾隆甲辰

高宗南巡至浙江杭城人家有懸桃符者句云一歲雙春

三月間六巡兩浙萬民歡又五十五年恭遇

八旬萬壽民間有頌聯云自古罕聞

聖天子八旬萬壽於今方見

大皇帝五代一堂兩聯語意雖質卻極自然穩貼可以見
草野芹曝之忱

程春廬曰乾隆五十五年恭值

八旬萬壽京中有一經壇燈聯極典麗又極渾成竟如天
造地設者句云八千爲春八千爲秋八方向化八風和慶
聖壽八旬逢八月五數合天五數合地五世同堂五福備

正昌朔五十有五年相傳是河閒紀文達公手筆蓋信非
吾師不能也

鄭仁圃大守

瑞麟

曰嘉慶己巳恭祝

五旬萬壽福州經壇設在鰲峯書院余曾擬一聯云沙數
恒河合十佛稱無量壽潮音大海呼三聲協不周風又擬
戲臺聯云曲譜四詩天保九如篇第一舞分兩向太平萬
歲字當中時院課卽以此命題余此兩聯曾爲游彤甫師
錄用至己卯恭祝

六旬萬壽經壇亦設鰲峯書院所有燈聯俱周蒼士廣文

嘉慶 擬作如云屆二十四年初週斗極祝萬八千歲遠紹

天靈又云如大海潮音嚮歌祝聖比恒河沙數壽寓添壽
又云呼萬歲者三康疆逢吉等百王面上福祿來崇又云
帝命式九圍仰緝熙于純嘏皇斂時五福用敷錫厥庶民
又云功既成矣世既貞矣參天貳地襲乎鼓之軒乎舞之
踏德詠仁 按乾隆年間兩次

慶典經壇燈聯聞俱係陳秋坪

登龍

黃耦賓

世發

張燮軒

經邦

及吾師鄭蘇年

光策

林暢園

茂春

諸先生所擬余少

時尙見先大夫手錄成本極其壯麗荷皇今此本不知何

時失去展向他處訪覓副本杳不可得惜哉

道光辛丑八月吳郡紳士於元妙觀恭設經壇祝

六旬萬壽時朱蘭坡侍講

珩

方爲紫陽書院山長撰次燈

聯數付具見精思如云六位仰時成六龍御世六鳳儀廷
聖德俯膺九五福十華徵券錫十賚孚恩十全繼續慈闈
豐澤萬千觴此於每句分嵌六十兩字也又云元符根太
極五百歲爲春五百歲爲秋春秋筭協福壽八葉椿開無
量壽妙果證長生三千年一花三千年一寶花實數周星
紀九重桃獻大羅天此於首句分用元妙兩字也又云大

地歡臚殷庶道統際重熙六葉升恒萬國萬年長拱極清
時盛譜和聲光天歌復旦十華紉綬壽星壽萬徧騰輝此
每句首一字合成大清道光六十萬壽也又云八音節八
風和月輪正滿十瑞臻十章獻日馭方中此兩聯中分用
八月十日字也

廟祀

蘇州泰伯廟中無佳楹帖惟齊梅麓

彥槐

有題泰伯墓柱

一聯云志異征誅三讓兩家天下功同開闢一坏萬古江南語殊壯濶曾見近人筆記亦載此聯脫卻志異功同八字又以爲齊眉樓所撰殊可笑也

安溪李文貞公爲直隸巡撫祈雨於關廟有應謝以聯云我意祈麥秋澤隨地徧公靈震華夏日在天中按此切事成文而麥秋華夏對仗自然工穩語亦正大相稱

常州荆溪縣有關帝廟楹帖皆不佳齊梅麓作宰時易以

新聯云威鎮雄州野樹尙含荆浦綠神游故國夕陽偏照
蜀山紅荆浦蜀山皆縣中地關合亦尙渾成 又撰一聯
云志在春秋孔聖人未見剛者氣塞天地孟夫子所謂浩
然頗得意然余終嫌志在春秋語非正史所有也

黃右原比部

與

曰記得關廟聯尙有兩家可錄者忘爲何

人所撰一云王業不偏安拒操和權諸葛猶非知已春秋
大一統帝蜀寇魏紫陽乃許同心一云生蒲州輔豫州保
荊州鼎峙西南掌底江山歸統馭至元德友翼德仇孟德
威鎮華夏眼中漢賊最分明按原本作兄元德弟翼德近

於演義陳壽志雖有義同兄弟之語並無孰兄孰弟主名
改本較爲妥協

趙歐北有關廟聯云乃聖乃神乃武乃文扶四百載承堯
之運自西自東自南自北如七十子服孔之心余於聯話
前編偶遺之

浦城西陽嶺上有關廟邑人朱緘三孝廉有一聯云至誠
之動孚及豚魚雖阿瞞莫敢不服大義所歸堅如金石惟
使君乃得而臣孝廉之子春門茂才虎亦獻聯云前杜氏
而好春秋仗義宣威此老原非徒左癖後岑侯而鎮荆楚

奉詞伐罪彼蒼何忍聽彭亡詞氣並岸異不凡

朱蘭坡曰關廟聯多用生前事遂成俗套余曾擬製一聯
但言尊崇顯赫之意云帝爽有昭明當朝謚號增崇奉戴
儀同文廟肅神功無代謝亘古河山作鎮靈長迥過蔣侯
奇按此與吾鄉龔海峯先生所撰命意正同可謂異曲同
工不落窠臼者矣

蘇鰲石廷尉

廷玉

曰涿州張桓侯廟聯多狀其雄糾語究

屬莽夫氣象於尊崇之義未合惟方葆巖

維何

作直藩時

有聯云使君乃天下英雄誼同骨肉壽侯爲人中神聖美

並勲名以先王關帝兩人夾出恰稱身分 按帝曾封漢壽亭侯壽侯二字似未協尙應酌易也

四川成都城外有丞相祠堂楹聯林立鄂涇泉督部

鄂山

聯云望重南陽想當年羽扇綸巾忠貞扶季漢澤周西蜀

變此地浣花濯錦香火擁靈祠又蔣礪堂節相

攸銘

聯云

曰宮曰殿曰幸且曰奔詩史留題千古猶存正統書吳書

魏書漢不書蜀儒臣持筆三分豈是偏安

四川甯遠府有丞相祠戴溪門督部

三錫

聯云籌筆在攻

心當年化治賓幪冠帶百蠻歸典屬安邊曾叱馭此日風

清颯脫雲霄萬古仰宗臣聞是湖南湘鄉令嚴麗生

學治

代撰嚴本才士搢筆故自不同又聞嚴麗生作湘鄉縣

龍王廟聯云春耕夏耘秋收冬藏萬物育焉鬼神之爲德
雷出地奮雲行雨施百室盈止膏澤下於民亦可謂取鎔
經義自鑄偉詞者矣

蘇郡文昌宮之旁有太陽宮向不入祀典亦不在朔望行
香之列道光十一年霖雨數十日郡人士始請余詣禱升
香之日旋即暢晴後卽定爲常祀齊梅麓爲之聯云光天
開紉縵之祥雨非恒雨暘非恒暘二十四氣成四時羣生

並茂化國衍舒長之祚朝不廢朝夕不廢夕三百六句有
六日庶績咸熙 又撰風神廟聯云龍虎忌爭行廿四番
花信吹餘致雨興雲勿張旗鼓豚魚占利涉七十二候箕神
鉞後飛芻輓粟好送帆檣時以狂風匝旬微漕連率屬虔
禱有應故以此爲報云 又撰龍神廟聯云九土足農田
但期膏不下屯霖雨徧剪天下望三吳稱澤國更願流無
旁濫江河長向地中行

鄭仁圃喜爲楹聯時見意匠有題天后宮聯云補天媯神
行地母神大哉乾至哉坤千古兩般神女治水禹聖濟川

后聖河之清海之晏九州一樣聖功想見精心結撰思與神通也

楊飛泉郡丞

鶴書

曾知雲南師宗縣後由浙省委辦銅差

復至滇中題天后宮一聯云三十年宦海平安旦夕焚香惟求利濟一萬里慈雲庇蔭開闢行役重許瞻依

四川灌縣城隍廟有蔡佛山手題聯云聰明正直之謂神清夜焚香惟願斯民敦孝弟雨暘寒燠以成歲豐年報享長期列部頌昇平又成都府城隍廟戲臺聯云善惡報施莫道竟無前世事利名爭競須知總有下場時恰是城隍

廟戲臺不能移易他處

蔡佛田曰佛寺聯語極多記得有二聯語極雋永句云願將佛手雙垂下座得人心一樣平又云彈指聲中千偈了拈花笑處一言無

明邛州人余昂有題海會寺聯云終日解其頤笑世事紛紜會無了局經年坦乃腹看胸懷灑落卻是上乘按此聯詞旨超脫似比吾閩鼓山寺一聯較為雅馴

福州有慶城寺中有鐵佛一尊極其雄偉係偽閩時所鑄廟中有前明會弗人吳撰一聯云古佛山來皆鐵漢凡夫

但說是金身雋永有味陳畏民筆談徐价人閩游詩話並
載其語惜余未得見其聯

蘇州光福有觀音大士廟祈晴禱雨最靈林少穆巡撫三
吳時題聯云大慈悲能布福田曰雨而雨曰暘而暘祝率
土豐穰長使衆生蒙樂利諸善信願登覺岸說法非法說
相非相學普門功德祇憑片念起修行一又因督濬劉河
小憩劉河鎮之天后宮題聯云八百年寰海昭靈瀋湄與
飛昇九牧宗風榮廟祀四萬頃具區分派喜集江新濬三
吳水利沐神庥 又題上元縣署中程明道先生祠云愛

物爲心一命於人亦有濟得民以道千秋斯統不虛傳
又題福州文藻山朱文公祠云道統闡薪傳洙泗真源今
未墜儒型垂梓社滄洲精舍此重開 又題嘉定縣歸震
川先生祠云儒術豈虛談水利書成功在三江宜血食經
師偏晚達篇家論定狂如七子也心降

桂林城外有臨水文昌閣極明瑟之致朱勳楣觀察榮題
聯云水月盡文章會心時原不在遠星雲燦魁斗鍾靈處
定非偶然

朱子生於延平之尤溪故小字沈即沈水名即尤溪縣亦

因此得名也後人皆誤以朱子字沈郎耳其地有公山文
山朱子誕生之日兩山俱發火光現出文公二字今就其
地建文公祠周力堂學使學健撰聯云前公山後文山一
氣蜿蜒知天地精華所萃始小學終大學真源脉絡統聖
賢體用之全

塗說云江南侯竹愚先生在粵時嘗題韓文公祠楹帖云
蘇學士前傳謫宦孟夫子後拜先生殊工切

漢口有桃花夫人廟一聯云烈女傳從劉向定夫人心祇
息侯知議論自在言外惜不知何人所作

虞山有白蘇二公祠齊梅麓卽集白蘇語爲楹聯云中有
仙龕虛一室更邀明月作三人上聯香山句下聯東坡句
也跋云香山詩近有人從海上來海山深處見樓臺此泮
虞立白公祠之公案也虛一室固待公也白公言之卽謂
待坡公也可又坡公題樂天身心問答三詩後云而今月
下三人他日當成幾佛以更邀明月句移奉白蘇二公祠
頗有根據非同泛語也 按常熟縣之白蘇二公祠建於
道光丁酉年在昭明讀書臺之側董其成者蔣伯生 因培
楊芸士 文藻 也芸士爲之記

齊謀麓宰宜興時撰周孝侯廟聯云朝有奸黨豈能成將
帥之功若教仗鉞專征蛟虎猶非對手敵世無聖人不當
在弟子之列誰信讀書折節機雲曾作抗顏師詞意激昂
可當一首周處傳論

甘露寺中有三賢祠不知建於何時祀唐李文饒宋蘇東
坡米海嶽三公也李蘭卿撰聯云游後先三百載游蹤異
代同堂能結有情香火冠今古第一流人物文章事業也
如無盡江山

謝默卿曰無錫惠山之麓有張睢陽廟額曰顯忠余莅任

時適邑人修建落成請爲楹帖因撰句付之云抗節濟時
艱論當年守禦聲威實先郭汾陽李臨淮功存廟社顯忠
關世教考茲土烝嘗舊典當與伍子胥陳武烈氣壯湖山
按張睢陽伍子胥及隋司徒陳杲仁其事皆不在錫山
而縣中皆有祠廟香火甚盛亦可見忠烈祀典出於秉彝
攸好之同矣

江西九江府有五顯廟中有一集句聯云九江孔殷以享
以祀五人爲伍乃聖乃神詞義俱極穩愜不知何人所撰
俟晤鄭仁圃時詢之

蠟磯廟聯思親淚落吳江冷望帝魂歸蜀道難人皆知爲
徐文長所撰惟繆蓮仙塗說謂此與采石磯李太白祠聯
云我輩此來惟飲酒先生在上莫吟詩並傳爲徐文長手
筆而余經過二地得見二聯皆無文長題欸惟署谷口鄭
簠書後聞蠟磯聯爲方茶山先生體感夢而作仍疑莫能
明也按方茶山年代甚近而此聯熟在人口實出茶山
之前後說恐仍是因文長事而誤演耳

金龍四大王爲北方河道尊神廟中楹聯鮮有傳者惟齊
梅麓一聯尙壯麗句云志節慕睢陽憂國讀書尙記金龍

山在英靈同伍相飛芻晚粟正須白馬湖來

錢棣溪曰唐張旭曾爲常熟縣尉故縣城南有草聖祠今爲文廟土地之神新立一祠於大成門之右廣文屬余書一聯一額余曰聯句尙易額甚難也再四思之總未題就偶憶韓文公優入聖域四字因書付之並撰一聯云書道入神明落紙雲煙今古競傳八法酒狂稱聖草滿堂風雨歲時宜奠三杯或嫌三杯字太涉廟祀套語余應之曰杜詩張旭三杯草聖傳豈忘之耶

海州板浦爲濱海斥鹵地自道光年間陶雲汀宮保改行

粟鹽民販趨之如市蕃昌殷贍儼然一都會焉宮保按部
海州兩駐其地登雲臺山並於山中建陶靖節祠今商販
居民又合詞籲建陶文毅公祠謝默卿撰長句楹聯云改
鹺法近悅遠來試觀淮浦連年浩浩穰穰豈惟追齊相夷
吾府海功施稱再造薦饒馨春祈秋報况對郁洲勝境熙
熙皞皞真可繼晉賢靖節名山祀典配三元

成都北門外歡喜庵奉德將軍楞泰像係乾隆金川凱旋
時爲士民所建楹聯云萬里版圖雲棧星郵往來下拜
功臣像百蠻碑在口渝歌賓舞歡喜常存故老思又冠履

肅丹楹似丞相祠堂栢鬱森森承雨露聲威通紫塞憶將
軍幕府旌揚熠熠壯風雲旁爲得勝庵卽阿公祠同時所
建聯云纏井絡以界坤維天府奧區皇極會歸雄帶礪控
荆蠻而引秦隴巖疆重任臣心寅畏凜冰淵

朱蘭坡曰宛陵城內有東平王廟祀唐張睢陽余少年應
試時至其處見一楹帖云祿山慶緒悍然其無君父當年
卽破孤城効忠亂賊曾邀富貴之幾時令狐尹奇不幸而
有子孫今日試登雙廟下拜先生將置祖宗於何地余最
喜其詞氣激昂今約五十餘年猶識不忘但不記爲何人

所作耳

涇縣會館中奉朱文公木主朱蘭坡爲題一聯云刪定贊
修直千古同功較漢唐訓詁諸儒仰高山而倍切德性問
學原兩端並舉任陸王紛紜異說撼大樹以何能朱文公
聯語亦多無如此之沈著穩括者

閩浙分疆之處爲楓嶺俗呼爲五顯嶺實卽梨嶺古稱梨
嶽祀唐太守李頻李蘭卿題聯云地是名山宜廟食民思
賢守本詩人五顯廟中楹帖極多皆遜此之雅切也

黃右原曰相傳藥王廟戲臺聯語一切戲一切藥頗有慨

乎其言上聯云名場利場無非戲場做得出潑天富貴冷
藥熱藥總是妙藥醫不盡徧地炎涼按潑天富貴仍是
從藥王廟生情非泛泛戲臺語也

呂月淦郡丞

瑣

曰宋梅生觀察

鳴琦

撰桂林城隍廟聯云

地獄卽在眼前莫到犯了罪時方纔省悟業鏡雖懸臺上
只要過得意去也肯慈悲又齊栴麗撰宜興城隍廟聯云
時雨時暘玉女銅官皆有慶好人好事橋蛟山虎總無驚
宋作係仁人之言齊作爲才人之筆

吾聞有石佛嶺佛像係就大石琢成陳望坡尙書未第時

將棄舉業過此嶺求籤詞意許其必遇三過三問皆一籤
貴後乃獻一聯於寺云心到虔時佛有眼運當亨處石能
言信乎佛之能前知也

嚴問樵

保庸

曰吾鄉出痘謂之出果種痘謂之種苗余嘗

撰痘神廟楹聯云一點心苗汝那裡好生培養十分善果
我者邊總肯周全

柳州柳侯祠聯句前集已載數家而愜心者殊少近聞伍
寶生撫部

長華

觀察右江時曾集柳文成句爲聯云潔廉

爲心忠信爲仗文章在冊功德在民十六字頗典重而至

今尙未懸挂不知何故

楹聯續話卷之二

福州梁章鉅輯

解字

徐州府爲古彭城今爲河漕重地專設監司筦之蓋兵備
道而兼筦河防者也宛平張觀察鼎自撰道署楹聯云地
當黃運之中水欲治漕欲通千里河流涓滴皆從心上過
官作軍民之主寬以恩嚴以法一方士庶笑啼都到眼前
來又武威孫太守治自作府署楹聯云官有典常任一日
則盡一日之心況兼地廣事繁敢不夙興夜寐民供正課

寬幾分則受幾分之惠縱使時豐歲稔常如怨暑浴寒皆不失仁人之言勝於揆張形勝者矣

揚州厲氏舊族也其宗祠柱聯云二百載青氈蟬聯八世兩三間白屋鶴隱千秋聯係史望之尙書所書其句則未詳孰撰也

戴旅塘瑞廕陰雜記云護國寺西先爲桐城張文和公第後改西華門內此第遂以賜溧陽史文靖公余癸未出錢塘王文莊公門下曾於此第謁見有江山勝地皆行部臺閣崇班半屬僚之聯

京師正黃旗官學中有楹聯云業精於勤修其孝弟忠信
學優則仕以爲黼黻文章

蔡研田

本俊

曰安溪李文貞公宅有小園自集句爲聯云

有水園亭活無風草木閒

彭芝庭

啓豐

自訂年譜云余曾三任浙江省學政因在貢院

題聯云蓉鏡重開漫向湖山尋舊迹桂枝擢秀相期月且
識真才

浙江學署面對吳山右鄰郡庠西出湧金門卽西湖也劉
金門先生題大堂聯云使節壯湖山東南壇坫文光拱奎

壁咫尺宮牆

黃右原曰有潤州太守新修廳事執贄於吳山尊學士求作楹帖學士不假思索卽對客揮毫上聯用金山銀山組織成文云山色壯金銀惟以不貪爲寶以譽太守廉能觀者歡呼亟請其下聯學士率爾撿觚寶未有以對也適幕賓郭香生明經曰想是江流環鐵石居然衆志成城蓋以鐵鑊城爲金陵石頭城門戶竟成強對遂書以應學士旣服其敏且有解國之功因以所得潤筆分贈之

揚州羅茗香

士琳

曰各省育嬰堂中有舊傳聯句云子不

子亦各言其子委而棄之是可忍也孰不可忍也先王斯有不忍人之政幼吾幼以及人之幼比而同之有以異乎曰無以異也大人不失其赤子之心集語頗能渾成貫串惜不傳作者何人也

謝默卿曰清節堂始於吳下由紳士捐建以居癯婦之貧苦無依者經費漸充規制盡善各府州皆仿而行之誠善舉也曹良甫比部君堅主講泰州時撰堂聯云任卹重周官集一方秉穗餘資門題行義帡幪同夏屋完幾輩冰霜苦節臺築懷清

齊梅麓婺源人嘗作婺源考棚聯云漬種必苗藝蘭必香
千家茆屋書聲定有幾枝大手筆登高自下陟遐自邇萬
里逵山雲路先從一邑小文場

嘉慶永福州大修貢院規製恢宏適林少穆督部奉詔里
居所有楹聯悉出其手亦極一時壯觀精思吾鄉人多能
口誦之如云皇路許馳驅舉孝典廉海嶠人文羅福地天
門同迭蕩悲聲騰實遂流才望奮清時 又云達四門四
目四聰我有嘉賓莫負文章華國選書六德六行六藝烝
哉髦士要兼孝弟力田科 又云初日照三神山看碧海

珊瑚盡收鐵網長風破萬里浪喜丹霄銀榜早兆珠宮

又集杜句一聯云鄉賦念嘉賓彩筆昔曾干氣象持衡留
蔭鑑文昌新入有光輝

王輔銘練音集云嘉定王丹思

敬銘

於康熙丁酉典試江

西以公愼自矢嘗題試院協一堂桂云三條官燭棘闈辛
苦廿年苟以溫飽負平生斯誓有如江水一介儒冠玉署
光榮兩世能取文章報恩遇此行方識廬山

嘉慶戊寅

恩科時鄧嶰筠督部方爲西安太守值貢院

鼎新曾撰楹聯數十對皆極結撰之工陝中爲之紙貴如

察院門云恩湛鸞坡環海臚歡歌曼壽名標雁塔曲江高
會洽羣仙又云地是周京廣進古人歌羽翼制循漢室特
頒明詔選賢良 大門云門對兩山看太乙峯高華國雄
文爭氣象恩迎北闕值長庚星朗作人雅化頌麗淇 東
大門云左席羅珍羣仰星槎來左掖東門額俊試看奎曜
耀東垣 西大門云運際右文鳳起蛟騰連右輔門迎西
極星輝雲爛照西京 大觀門云科重西京盛世作人徵
壽考躋逢南極祥暉絢采接文昌 連三門云地接龍門
多士須聯魚貫隊恩開虎榜嘉賓同拜鹿鳴歌 明遠樓

云地重棘閣看雲裡羣飛四面軒窗增壯氣輪圓桂殿聽
月中舞羽一番鼓吹接仙音又云樓起層霄是明目達聰
之地星輝文曲看筆歌墨舞而來至公堂云戊茂協菁
莪璧月圓時同壽寓宣清收杞梓璫雲多處閉文星又云
恩被賢良聽天語鸞銜象殿綵綸承北極科聯甲乙喜人
文鵲起辟雍鎗鼓振西京此以戊寅恩科四字冠首也
精白堂云函關東玉關西萃兩省人文手提珊瑚網使星內
台星外合一時宗匠心澈冰壺又云精白一心入手恍聽
蠶食葉丹黃萬卷到頭佇看鹿銜華衡鑒堂云典重求

賢籀節分持宜漢詔堂開額俊輶軒親到採秦風 監臨
堂云地鎮中權看露冕宣風玉鑑冰壺同朗照才登上選
聽霓裳咏月祥麟威鳳共騰輝 內簾云岌嶮龍門雷浪
可容輕躍過分明蟾窟霓裳未許竊聽來又云擔弛戴星
且共岑苔吟夜月文披垂露便看玉筍坐春風 收卷所
云稱心好句欣先覩入手奇文豈漫藏 彌封所云姓氏
不妨借豹隱光芒終許看龍騰 謄錄所云絢采文疑堆
錦繡研朱筆合架珊瑚 對讀所云顧誤辨訛須守黑分
章析句合塗黃 按此外尙有所主考及提調監試各聯

皆各切其人之官階科分里貫言之移地移時俱不適用
茲不俱錄云

林少穆督部總制兩廣時海禁方嚴督部於城外新建一
演武廳精選督撫兩標勁卒數百人親往督操自題廳柱
一聯云小隊出郊垌願七萃功成淨洗銀河長不用偏師
成壁壘看百蠻氣懾煙消珠海有餘清

鄂城臬署有鄧嶰筠督部一聯云官要虛心總能發伏釐
奸須識我得情勿喜民宜守分若到達條犯法可憐汝無
路求生仁人之言出乎肺腑矣

英觀察煥堂守登州時構小園旣成屬嚴問樵代撰楹聯
云願他十邑諸公清風扇野客我一年四季明月鋤花
杭州北新關較各關尤爲嚴切商民多裹足不前阮芸臺
師撫浙兼管關務自製一聯懸於關署大門云上古關無
徵後世不得已而權關慎勿失其初意本朝稅有額小民
如其分以納稅何可使有怨言

四川成都將軍署中有阿文成公題聯云拱北星辰兼上
將征西部屬半通侯

四川彭水縣有摩雲書院在山半陶文毅公任川東觀察

時道經其地書聯贈山長云化雨無私憶往歲踏雪來過
曾話春風一席塵雲有志願諸生凌霄直上勿忘燈火三
更益公先曾以典試過此也

蔡佛田撰各憲署官廳聯云片刻聚談此地無分賓主一
時握謁其間原有後先又撰巡捕官廳聯云得月快爭先
共仰樓臺近水望風齊向上欣看冠佩如雲

齊梅麓居婺源之冲麓有敦蕸堂大祠自題聯云得氏營
邱瀛李唐同朝二相在野三公下迄宋元明代有文人光
海國卜居冲麓看梅里排闥四山環村一水甲於皖歙婺

天開圖書寰瀛洲又一聯云大夫不敢祖諸侯表海雄風
莫問遙遙華胄途人其初本一體敬宗收族當思密密連
枝

朱蘭坡曰余曾爲同邑江氏祠堂撰聯文云梁貴胄唐遺
忠易姓前徽崇一本歙僑居涇奠宅敦宗後嗣叙三支蓋
江本蕭也昭明太子之裔復顯於唐末以避難改姓居歙
之黃墩南宋徙涇總稱黃泥灘江氏稽其派則有三焉發
源江氏慎修先生實與同宗人皆不知先生爲蕭姓余聞
諸江石生大令又代製同邑王氏宗祠聯云孝友著華宗

遠追竹港遷居十三支共聯閭閻牲盛隆祀新仰松楸
旅設千百世長聚簪纓我涇義有十三王之稱竹港者其
始居地名先世曾以孝友聞 又曰余先世本在蘇唐末
遷歛復遷婺源宋代始遷涇嘗爲宗祠聯云遷移自吳歛
嫠而來氏族清嘉斯地奠安稱梓里裔嗣踰宋元明以後
詩書啓佑幾人騰翬詠梧岡又云某院溯遙宗傳三十世
有奇間巷相聯敦仁敦讓李村鄰舊宅閱百千年無替歲
時竝集奉醴奉盛茶院公乃與文公同出之始祖也初遷
涇居李村其舊宅已六七百年尙存宗祠地正相近又爲

支祠聯云追古察六世遷居中越十傳祿出喬支綿緒人
歷昭代兩朝 宇後垂于禩蔚成盛族綰綸多案古察即
茶院公也六世爲遷涇之祖拙翁府君蓋文公之伯曾祖
復十世則支祠分祖用鑑府君子姓獨多科名仕宦亦較
盛祠宇在 本朝由順治至康熙間始建數聯雖常語然
非他姓可以移置也又云春有心于露秋有心于霜遵戴
記遺規欽崇典祀父之貴者慈子之貴者孝式文公懿訓
篤念倫常此出聯尙可通用對話本文公家訓固仍切合
矣

吾鄉林青圃先生德性嚴重所作楹帖亦不肯作尋常語
主齋峯講席時曾手書講堂一聯云坐里門內父而朝教
不忘就爾事習君子言尊以徧學莫便近乎人此聯已後
陳恭甫編修壽祺亦撰一長聯意欲媲美前修而兩小股
墨卷時腔徒成話柄而已今明倫堂頭門聯云方千里育
賢之地第一重八聖之門亦青圃先生所撰也

有集文選句爲祠堂聯者云蹈德泳仁發祥流慶興廉舉
孝畧行議年又一聯云秋元祀禮莫愆繼禩繼祖繼高曾
孝思不匱屢豐年歲其有奉牲奉盛奉酒醴明德惟馨皆

可爲家祠通用之楹帖

朱蘭坡家有小園甚隘僅栽桂一株洪稚存題扁曰金粟山房蘭坡自爲聯云曲象三弓庾信有園難拓地連蜷一本劉安之樹可留人

劉松嵐大觀爲州牧時自題署齋一聯云袍笏呼來先拜石管絃麾去獨聽松爲翁覃溪師書或云卽翁撰句以贈者新墜逗削使事無痕殆非吾師不辦也

蘭溪縣城中邑令署頭門聯云明月雙溪水春風滿縣花雅切蘭溪而有餘味惜未詳何人所題

余於五十八歲請假歸田在福州黃巷新宅所撰楹帖已
載人叢話前編茲於壬寅秋復引疾得請僑居浦城因購
得荒地數弓縛茅采屋暫爲爰廬之寄時異事遷因就舊
詞稍更新意以存一時情事云爾中堂聯云厯宦海兩朝
身萬頃驚濤仗忠信借他鄉一廬地卅年此屋亦辛勤詩韓
辛勸三十年以有此屋廬又云安土而能敦因寄所託擇鄰焉得智且
佳爲佳宅左有園額爲北東園以福州舊宅有東園也園
中有池有樓池上三堂聯云客來醉客去睡老無所事吁
可愧論學粗論政疎詩不成家聊自娛又一聯云地價不

妨多明月清風本無價物情何足校近水遙山皆有情此
聯紀近事而借歐陽文忠及蘇子美詩語以解嘲也又書
空中一聯云平地起樓臺流寓依然吾土美著書多歲月
還思未報主恩深

勝蹟

閩鶴瞿叙 埤述云桂林七星巖下有壽佛洞僅容旋馬內
有古壽佛石像云土人有見老僧者跡之至此洞得遺像
遂剏爲菴楚僧水符號渾融者建爲棲霞寺起藏經閣其
下爲靜慧堂旁爲聽月亭余有慰賢二字題石而集唐句
爲聯云白雲回望合青靄入看無按今棲霞寺座落與此
所述互異舊址縲不可尋志乘中亦未採此書而題名與
亭聯更無有能指其處者矣

無錫北門外有皇甫墩在芙蓉湖中四面皆水飛樓縹緲

極似西湖之湖心亭窻戶軒檻皆九龍山翠所涵演登覽
勝概甲於通邑樓中聯榜尙多惟孫平叔官保聯云燈火
春星浮北郭雲霞朝景攬西神秀整雅切邑人盛稱之西
神卽九龍山也

山陰石屋在香爐峯之半山有楹聯云花雨欲隨巖翠落
松風遙傍洞雲寒錢唐于謙題見小倉山房詩集

或傳梅關一聯云不必定有梅花聊以志將軍姓氏從此
可通粵海願無忘宰相風流按梅關卽梅嶺又名庾嶺史
記索隱謂相傳以梅將軍名而南康記又云前漢南越不

賓遣監軍庾姓者討之築城於此因之爲名則兩說皆可
通南康記又云庾嶺多梅亦曰梅嶺高一千三百五十丈
唐張九齡奉詔開鑿按張有開嶺路序又有詩故嶺巔有
曲江祠此聯穩括大意面面俱到矣

林少穆觀察杭州時曾修孤山林處士祠又葺梅亭題亭
柱一聯云世無遺草真能隱山有名花轉不孤

林少穆有集句題京師陶然亭聯云似聞陶令開三徑來
與彌陀共一龕亭中楹帖當推此爲第一

貴陽城外有圖雲關不知誰氏一聯云兩腳不離大道喫

繁關頭須要認清岔路一亭俯看羣山占高地步自然起
上前人亦見道語也

徐修梅茂才

汝棧

曾游黔中錄憶數聯有飛雲洞聯云洞

闢幾時問孤松而不語雲飛何處輪老鶴以長閑爲天門
龔學海所題又鎮遠大王灘亭聯云到岸猛回頭聽濤陽
第一灘聲浪與篙爭好仗神威資利濟順流須努力看黔
國萬重山水峯隨舵轉全憑忠信涉波濤

聞福州永福縣之方廣巖奇景天開余屢欲往遊而不果
友人江心葵

景陽

爲述一聯云石室天開見大地山河三

干世界水簾風捲露。天樓閣十二闌干心葵所居距巖
甚近余四十年前卽有同游之約每爲之神往云

九江府庾樓。一郡大觀屹立郡署之後前襟大江後枕
匡廬樓額。蘇軾所書江心卽望見之樓中聯語多不
稱郡守張子良。黃聯云如此江山何幸不才來領郡亦談
風月每逢。六卽登樓語稍穩貼尙不如洪稚存先生
言一聯。望江山六朝雄鎮一樓風月幾輩傳人足與
斯樓相。四六字以爲名下無虛是也

余初游。山堂正嘉慶元年草草一過而已後讀曝書亭

集中有鄭谷詩云山堂扁長歌悔彼時不及留心賞
玩體之旨詩云山堂者亦俱若無覩道光壬寅初夏寄居
邛上登此堂則前後相距已四十餘年堂中扁字係歐
陽文忠公之款疑款字甚劣非歐公所爲而鄭谷口所題
亦渺不可得不知何故徧繙郡志則不但無歐陽題扁事
且鄭谷亡之扁亦未載豈竹垞先生之詩欺人哉頃與錢
梅溪談及梅溪乃言曾親見谷口原扁後爲吳中徐友
所易以歐款記得是乾隆年間第六次南巡時所
爲梅溪年八十有四多見舊事所言當不虛也平山堂

並無他扁谷口所題又易爲歐欵可謂兩失而伊墨卿隸
書聯句遂獨出冠時矣余前編所錄墨卿句誤隔江爲過
江茲特正之余亦新製一聯云高視兩三州何論二分月
色曠觀八百載難忘六一風流質之阮芸臺師甚壯其語
朱蘭坡同年亦自平山堂詩以王荆公一堂高視兩三州
首爲最平山堂聯以伊墨卿隔江諸山十六字爲最今君
此聯出真可鼎立而三矣因亦用隸體書就送懸堂楹王
荆公遠矣未知墨卿空中笑人否耳

張伯治曰揚州大儒坊董祠之左近有集賢樓下臨城河

形勝絕佳記得有一集句舊聯云桃花潭水深千尺明月
揚州第一樓不知盡舫錄何以遺之

前編所載揚州楹帖多據盡舫錄比來寄居邗上新有聞
兄亦佳聯也如陳曼生 鴻壽 題康山云春水綠波揚子渡

梅花明月狀元山洪桐生 梧 題東門城樓云風月天高樓

臺地迥雲霞海曙梅柳江春又題南門城樓云東閣聯吟
有客憶千秋詞賦南樓縱目此間對六代江山

相傳河南南陽府城樓舊有楹聯云真人白水生文叔名
士青山卧武侯對仗渾成允稱傑構或疑諸葛應稱忠武

侯但曰武侯恐未盡善然古人二字三字謚後人止稱甚
一字者甚多如衛之叔聖武公只稱武公貞惠文子只稱
公叔文子楚之頃襄王只稱襄王秦之昭襄王只稱昭王
諸葛之稱武侯亦其例耳

北固山甘露寺之左舊爲多景樓俯挹全江最稱雄勝樓
址久荒李蘭卿觀察曾捐貲重建工甫竣旋圯觀察撰聯
云天與雄區欲游目騁懷一層更上地因多景喜山光水
色四望皆通後曾文敬公承顯就北固山之後麓建江
東勝概樓重書觀察聯語懸諸前楹而於後楹自撰一聯

云形勢拓南徐對秣陵樹色瓜步江光何處平分吳楚畫
圖開北固有米老菴存衛公塔在依然映帶金焦樓之右
又有小樓正對金山有南昌彭文勤師聯云兩點金焦到
山者不如望一菴海嶽懷古者見其人蓋寶晉書院正當
其前也

九江府之南卽廬山其城南正對廬山之雙劍峯歷朝皆
於府治前建三層高樓以鎮之名爲匣劍樓樓前開二池
直丈餘橫數尺名爲匣劍池鄭仁圃太守初蒞任修濬一
新自製樓聯云排闥兩峯青欣輪奐齊雲環雉堞更上一

層盡見匡廬真面目千霄千丈紫恐鋒鋌過露飲龍光深
藏什襲如羅星宿壯心胸

蘇州泚墅關北望亭卽入金匱縣境河中舊有豐樂橋齊
梅麓宰金匱時鳩工重修蔚爲勝地因題橋門一聯云水
遠天長萬古川原連泰瀆年豐人樂四時風景勝滁陽又
杭州城外之半山桃花最盛花時游船麇集秋後紅葉亦
極可觀旁有小橋橋門一聯云欲泛仙槎向何處偶傳紅
葉到人間皆橋門聯之極超脫者

清江浦勝蹟以河帥署中爲最有方池甚寬上爲荷芳書

屋擅水木之勝時張芥舫河帥得董思白大字挂屏十二幅錢梅溪爲集屏中字作一聯云大隱寄淮壩十畝芳塘涵德水高懷擬綠野蒲園花木繡春風

成都府城外有諸葛丞相祠旁有臺榭爲大僚飲餞公所蘇轍石廷玉集杜句爲楹帖云諸葛大名垂宇宙元戎小

隊出郊垆按此前明黃才伯所集見朱竹垞靜志居詩話

唐陶山仲冕有集唐句題陶隱居祠云門前學種先生柳

嶺上長留處士墳

滕王閣中有裴可亭郡丞行恕聯云隔岸眺仙蹤問樓頭

黃鶴天際白雲可被大江留住繞闌尋勝蹟看樹外煙波
洲邊芳艸都憑傑閣收來

采石太白樓中有齊梅麓集句一聯甚偉出語云紫微九
重碧山萬里卽太白集中句對語云流水今日明月前身
則司空表聖詩品中句耳

黃右原曰揚州三賢祠舊以王漁洋繼歐蘇後已不甚稱
後更奉伊壘卿太守長生祿位於旁而議者益起自裁撤
益政後湖上園林歲修無主頽廢不堪李蘭卿權使獨能
捐廉重修江山文選樓桃花菴各處而別建載酒堂於祠

楹聯續話

卷之二

十一

側以祀漁洋於是香火始正樵使並爲之聯云盡了公事
夜接詩人得句皆堪作圖畫修禊虹橋訪碑禪智此才真
不負江山

自浙入閩第一重嶺爲蘇嶺嶺頂有關廟殿後一亭境極
幽靚有朱笥河先生手書一聯云雲石江將疑字浙風篁
嶺若誤髯蘇跋云過蘇嶺留句乾隆庚子十二月廿日笥
河居士朱筠余每過此必熟賞此聯寺僧亦知寶之寺中
又藏有朱文正師詩卷卽爲此聯而作和題者有譚蘭楣
光祥及吾鄉林樾亭先生王蘭陔

紹興

中丞中丞復作長

跋紀之謂此聯句奇而筆道若有靈氣光怪足以永鎮山門者洵不虛也

黃州赤壁以坡公二賦傳耳其實周郎用火攻處在今嘉魚也人皆議坡公之誤朱蘭坡題聯云勝蹟別嘉魚何須訂吳箴譌但借江山提感慨豪情傳夢鶴偶爾吟風嘯月毋將賦詠概生平

雲南附郭之大觀樓中有孫髯所製長聯懸挂已八道光初阮芸臺師總制滇黔時爲酌易數字另製聯板懸之滇人曠有煩言余曾於前編述之昨接吾師來函云孫髯原

聯以正統之漢唐宋元偉烈豐功總歸一空爲主豈不駸

駸乎說到我朝故改爲幾長蒙會遞到吳三桂等人身

上所以扶正而消逆也噴有煩言者蒙會未達耳按原

聯及改本前編已並全錄今必須重錄改本以質觀者使

知吾師所以須改之故以釋滇人之疑而已改本云五百

里滇池奔來眼底憑欄向遠喜茫茫波浪無邊原本作披襟岸憤喜

莽莽空看東驤金馬西翥碧雞北倚盤龍南馴寶象原本金馬

作神駿碧雞作靈儀倚盤龍高人韻士惜拋流水光陰本

作走蛇蜿蜒馴寶象作翔編素勝登臨選起蟬嶼螺洲親將起蒼厓翠壁原本作梳篦更就風鬟霧鬢

蘋天蕩地早收回薄霧殘霞原本作點綴莫辜負四圍谷

稻萬頃鷗沙原本作晴沙九夏芙蓉三春楊柳數千年往事

注到心頭把酒凌虛歎滾滾英雄誰在想漢習樓船唐標

鐵柱宋揮玉斧元跨草薺薺長蒙酋原本作偉烈豐功費盡移山

氣力佳殊策畫棟捲不及莽雨朝雲便蘼碣苔碑原本作斷碣殘碑

都付與荒煙落照原本作荒作蒼祇贏得幾杵疎鐘半江漁火

兩行秋雁一枕清霜原本作兩行鴻雁一片淪桑

廣西宜山縣為黃山谷先生謫居地城中有山谷祠堂查

儉堂撫部守慶遠時重新之並製聯云忠孝振綱常黨絲

編名氣節宛如東漢文章垂宇宙詩家衍派門庭別啓西
江公誕辰在六月十二日李蘭卿權守時率諸生爲公設
祭如坡公生日故事祠內舊有資華亭墨池諸勝今已湮
廢蘭卿亦製聯云載酒爲公來率儒服儒冠仍似舊開詩
屋宴傲居無地佳占宜山宜水卻教長祭墨池田

福州城外由江達海之路以羅星塔爲關鍵塔據山巔四
面皆波濤洶湧其由閩縣達長樂則必以羅星塔山下爲
泊候潮之所蓋海潮由此而分也塔上舊有七字聯不
知何人所撰其句云朝朝朝朝朝朝夕長長長長長長消

過客皆不知所謂康熙中有一道人到此讀而喜之衆請其說道人笑曰此山爲海潮來往之區此聯出語第一第二朝字上平聲第三朝字下平聲連律字第四朝字亦下平聲第五潮字上平聲第六朝字又下平聲對語第一第二長字平聲第三長字上聲第四長字是平聲第五長字是上聲第六長字又是平聲如此讀之自不煩言而解不過是言潮汝長消而已言訖道人遂不見或以爲純陽祖師現身也

河南輝縣城外有古百泉發源蘇門山中匯爲巨池詩所

謂泉源在左是也歷代名人多隱於其上左有孫夏峯先生祠程梓庭中丞題聯云勝地集名儒軼姚許趙竇以抗宗傳羣仰夏峯作喬岳熙朝開理學繼濂洛關閩而昌後裔從教睢水得淵源謂姚雪齋許魯齋趙復竇默及我朝湯文正公也

格言

道光癸巳引疾里居日向街巷舊書攤中搜求故紙忽得
孫寄圃閣老楹帖一對閣老手蹟余所認識非他手所爲
而筆法腴潤是作翰林時書不如後此之蒼勁也句云甘
守清貧力行克己厭觀流俗奮勉修身款云天池年伯大
人製句命書濟甯愚姪孫玉庭乃知此聯係爲先大父天
池公所作閣老與先叔父九山公爲亡未同年此必係九
山公同居館職時爲先大父索書者因急購歸重加裝裱
先代訓言藉茲不墜當拳拳服膺如日侍先大人嚴正之

容非僅作墨寶珍皮也

香祖筆記云余家自高曾祖父以來文房正廳皆置兩素屏一書心相三十六善一書陽宅三十六祥所以垂家訓示子孫也又各房正廳一聯云繼祖宗一脉真傳克勤克儉教子孫兩行正路惟讀惟耕

余前編聯話敬載先資政公常書楹帖云非關因果方爲善不計科名始讀書此吾鄉習傳之語不知撰自何人言極切近可守渾然無弊後閱亡友顧南雅菴思無邪齋遺集一條云嘗見陳句山先生所書楹聯作不關果報方行

善豈爲功名始讀書二語殊未了古今果報之爽者十有八九若此念未忘其阻善機者多矣至於功名二字在三千朽之列正讀書人所當念念不忘者以爲立功立名之地此殆誤以科名當之耳茲爲人書楹帖特改六字云必忘果報能爲善欲立功名在讀書其義乃圓云云其實科名功名義各有當未見勾山之必誤也

謝默卿曰虎邱山後女墳湖北風景幽絕岸旁一古剎懸一聯於客堂云乾淨地常來坐坐太平時早去修修語極冷雋畫舫往來笙歌鼎沸之外忽聽此禪窟機鋒真如暮

鼓晨鐘發人深省

桂林呂月滄掌秀峯書院嘗擬題講堂一聯云先有本而後有文讀三代兩漢之書養其根埃其實舍希賢莫由希聖守先正大儒之說尊所聞行所知甫欲製板懸挂而驟歸道山其門弟子尚有能述之者

唐陶山家有果克堂自題聯云克己最嚴須從難處去克爲善必果勿以小而不爲

彭文勤公有集句堂聯云立身行道揚名於後世風興夜寐無忝爾所生

齊梅麓集詩經語作宗祠聯云凡今之人不如我同姓聿
修厥德無忝爾所生 又敬思堂聯云曲禮蔽於無不敬
逸詩刪以未之思又一長聯云士恒士農恒農工恒工商
恒商族少聞民便有興隆景象父是父子是子兄是兄弟
是弟門無乖氣方爲孝友人家

丹徒張伯治巡檢

驥

偕其嘉耦錢蓮因女史

守璞

並以詩

畫擅名論畫則伯治爲精論詩則蓮因尤健粵西邊瘠之
區蓮因間關隨宦能相其夫甘於末秩不以富貴利達薰
其心不愧女士之目嘗因伯治豪飲健談爲手書楹帖於

座右云人生惟酒色機關須百鍊此身成鐵漢世上有是非門戶要三緘其口學金人以聞媛能爲此格言真不愧女士也

揚州馬氏小璵璣山館中有鄭板橋所撰楹帖云敲定幾句有用書可忘飲食養成數竿新生竹直似兒孫以八分書之極奇偉後歸淮商黃姓始擬撤去復有愛其文義者乃力勸畱存

黔中巡撫署齋有顏懔甫檢手題一聯云兩袖入清風靜憶此生宦況一庭來好月朗同吾輩心期殊有理趣而措

詞蘊藉不涉腐氣故佳

漢口有同善堂所以施惠新立規制莫垂久遠邑人乞朱
蘭坡聯句題云同德即同心從教救病噓枯體天意好生
而布惠善終如善始願得提綱挈領遵聖言思永以圖功
又銅陵大通鎮設救生船亦爲其局中製聯云博愛之謂
仁當知拯難扶顛愷惻常同施補救見險而能止但願風
帆浪舶倉皇轉得報平安

大傳朱文正師視學浙中時因原籍紹興特榜其門楹曰
鐵面無私凡涉科場親成年家須諒我鏡心普照但憑文

字平奇濃淡不宛渠

姚文僖公

文川

督學時每試院輒題一聯云科場舞弊皆

有常刑告小人毋撻法網平生關節不通一字誠諸生勿聽浮言又自撰堂聯云世上幾百年舊家無非積德天下第一件好事還是讀書語皆近質而實足以訓俗

張蘭渚先生喜書格言爲楹帖爲闌撫時嘗屬余書一長聯云戒之在闕戒之在色戒之在得職思其居職思其外職思其憂或疑先生此時何以尙須戒闕余曰聖賢言語徹上徹下可以自警可以警人且聖人所謂闕豈必在角

膂力逞戈矛凡口給禦人文字抵觸皆與國無異居高位者尤宜慎之庶不招尤不僨事耳

張仲甫中翰

應昌

蘭渚先生哲嗣也最恪謹守家法近手

錄先生所集經語楹聯見寄如云有忍乃有濟無愛卽無憂上句出尙書下句則四十二章經中語也又一聯云洗心曰齋防忠曰戒循法無過修禮無邪上句出易繫辭注下句則戰國策中語也

張仲甫齋中亦有自撰聯句云貪嗔癡卽君子三戒戒定

慧通聖經五言

自注卽定靜安慮得

此以釋語爲儒書注腳也又一

聯云陰陽風雨晦明爰之以節夢幻露電泡影作如是觀此湊合左氏傳周易語以對佛經也蓋仍是蘭渚先生家法又有一聯云掃地焚香清福已具粗衣淡飯樂天不憂則純是儒家語也

萬廉山郡丞

承紀

嘗製大篆一聯見贈云仁仁義宜以制

其行經經緯史乃成斯文見者皆以爲寫作俱工余嘗入其書室讀其自集子部語作篆聯云凡避嫌者內不足有爭氣者無與辨是極好格言賀耦庚盛喜之惜其字句未能勻稱平仄亦尙未諧耳

黎湛溪河帥喜拈要辦事莫生事要任怨莫較怨四語嘗
請節相孫季圖公作對語公應之曰可興利并近利可急
功毋喜功藥石之言正河帥所宜省勉也河帥卽屬陳曼
生郡丞分書爲聯懸之署齋客位云

黃右原曰有客贈聯云每思於物有濟常愧爲人所容又
云久病始知求藥誤衰年方悔讀書遲又云過如新竹茂
難盡學似春潮長不高皆格言中雋語

化曉亭曰有贈宣刺史

瑛

一聯云辦事人多能事少愛民

心易治民難下七字獨沈著有味真格言也今人但從事

其易者已爲好官耳又一聯云凡事總求過得去此心先要放平來亦言淺意深可銘座右

朱蘭坡家塾中有培風閣自題聯云仿君子懋修志無怠功無荒箴游觀所其無逸求古人陳迹經有程史有課警稼穡乃亦有秋又有志勤堂聯云士所尙在志行遠登高萬里鵬程關學問業必精於勤博聞強識三餘蛾術惜光陰字字沈實足以型家矣

林少穆自題廳事一聯云海納百川有容乃大壁立千仞無欲則剛名臣風矩惟其有之是以似之接近見一廳事

有書此十六字爲聯而兩句乃上下互乙遂以對語爲出語其意則同但不應掩其名而用其句耳

少穆卸兩廣督篆後有引疾歸田之意嘗豫撰書樓一聯云坐臥一樓閒因病得閒如此散材天或恕結交千載止過時爲學庶幾炳爛老猶明寄書囑余爲作隸字余謂此願未易酬且俟他日把臂入山時再訂此案可矣

孫寄圃節相 王庭 由湖北布政使入 覲

睿廟有爲守兼優之諭公於大堂敬題楹聯云領三楚雄藩來甸來宣問何以推心赤子承九重懿訓有爲有守要

無慚對面青山

余陳臬山左薦泰安合徐樹人宗幹為卓異聞其所至有

政聲其宰武城時遇歲歉頻年緩征又以病乞假手製一
聯懸之廳事云惟貧病相兼乃稱寒士並錢漕不取纔筭
清官復聞其宰任城楹聯云老吏何能有訟不如無訟好
小民易化善人終比惡人多皆可以勸

陳家相明府

杜臨

為河南襄城令時建汜川書院費耕亭

太宰

庚吉

聯云聞使君講院新開說禮敦詩名相風流推

後起願諸生賢關早闢讀書論道大儒理學有真傳蓋明

府爲桂林陳文恭公後裔也

嚴問樵曰余宰棲霞每奉家君子手諭諄諄以立身居官爲勗蒙賜一聯云職在地方但無忘該管地方卽爲盡職民呼父母倘難對自家父母何以臨民庸受而誣書之懸之廳事朝夕自勉因復推廣其意撰聯書於堂楹云暗室中自有鬼神倘鑒余少昧天良甘爲一錢誓死公堂上誰非父母最憐爾難寬國法苦從三木求生 又曰有一縣令自題其訟堂云有一日閑且種牧地無十分屈莫入吾門亦書一聯懸之